

三十三冊
卷之二十六
春明逸史二

林下筆記

林下筆記卷之二十六

春明述史新錄上

心庵先生

游觀問答

群相同而出仕異

孫武功臣

靖子有猷

大官崇奉

大官居智

宿城志耕

林下筆記卷之二十六

春明逸史目錄二

心庵先見

游觀問答

拜相同而出仕異

振武功臣

蟾子有徵

大官榮養

大臣居留

宿城屯耕

大典會通編輯

文獻備考續纂之役

孝貞公藻鑑

鄭門回登

回登詩

守先訓不出仕

夢中作詩

特諭勉留

三相分兼提舉

原任相兼武府

筵奏先後

稱慶典禮

御書恭記

書冊頒賜

四朝寶墨

冲年御書

便殿御書

三朝賡詩

回榜老人相戲

心庵病革不亂

下詢邊情

聖教恭記

冕服不用錦綬

親耕藉田

親耕時奏辭

大臣製進綸音

經山徵文

元老製文

經山紅帶

三回帶

砲糧米議

夢應廣詩

虛懷考試

仰勉保嗇

經山就養

鄭門五詔

趙氏福力

門闌相同

翰林洞

榕溪撰文

老年書金石

聖誕有據

造體之豪

中書故例稍弛

相臣相揖節次

大臣座次

政府銀印

大君印

大臣伴問之禮

大臣見岳翁禮

輔國體例自別

輔國藥院提舉

輔國宣麻

外任入閣

藩任拜相交龜禮

大官異數

太常郎官峻選

相臣方席

軍門都相為客官

槐院公堂本末

檢詳坐起尊先生

檢詳廳

居家好規

道伯見守令式

假都事與監司交龜禮

道臣或不得直開京司

去運餉銜

大臣首班之避

刑魚從陞

翰林春秋不得減下

右史為政院郎

武班峻逆

武臣上疏

大官無相避

宦蹟同門內故相

李門三派相臣

龜川不祧之典

桃李村記事

省謁先禁

金石合錄

李氏花樹室

萬卷樓

李氏影堂

金帶說

名山歷覽

四都八道公私行

西南伯煩劇之別

銀貨有靈

完營封椿銀

荒貨商帖文

廢朝墳墓

麗王陵

仁陵遷奉

玉江說

自溫臺

皇賜玉笛

懷古詩

裴堂詩才

南金陵不與人較

七山漁艇

葵樹驛

嶺箕兩任相忘

完山題咏

松廣寺異樹

松廣寺佛毘

寺刹大銅毘

檜巖寺之廢

古綃天下地圖

駕轎勸馬聲

驪州幸行

雲監生天文

宿警言

書冊校整

麒麟夢

平泉無床奴

吏胥分曆

秋史最慎字畫

金吾郎

史官鑰硯

龍灣所御輦

戚里私覲之稱

小兒陽氣之說

九十脚病

李叅奉詩

李教官詩

大神禁令

青袍之令

仕女衣

問疾星山

戒多貯梅花

風器之異

大臣子弟嫺廟務

御真仰瞻時不敢承著眼鏡之教

抱書案

存齋

記朴存齋言

兩館提學并書職銜之規

月巖

可憐碑

巖尚書語燕俗

大風致語

鄭瓢泉規模

裴忠臣

備祭品時規模各異

月遷

平生不繫帶

書冊避亂

涓妓評饌

林下筆記卷之二十六

月城李裕元景春輯

春明逸史

心庵先見

余陞正卿心庵語到宦業皆有定限余登科後七年
緋玉又七年軒貂又七年環金則此去六年可期環
玉公屈指曰甲子當為大拜余曰環玉亦過矣公笑
曰君之環玉豈可拖至六年乎必然加於此而大有
聲也因相笑而罷環玉則果於五年後為之拜相在
於六年心庵之言似非有意而發然年條相符也

游觀問答

余初拜相游觀來訪曰家兄大拜時我告之曰中書之事別無所難以一日之事了於一日內而所當之事以所當者磨勘不必求別件事權彞齋聞之曰為此言者可為是任我今以此相勉金公之言果當矣拜相同而仕異

余與荷漪任公同拜相而余在外故任公先為出膺及余上京公同諸相來見余恭執朝體公曰右位之若是前所未有也明日則吾當修下位之禮羣公俱笑曰此言可補中書故事矣

振武功臣

純祖甲子特念適變時立功之臣命相臣鰲恩君率
張玉城鄭錦南後孫入侍厚下賞賜問名調用蓋張
鄭兩公俱是白沙先祖拔擢也當了甲子余適在相
任竊有待之竟無首相之舉此仰奏

螭子有徵

乙丑正月余攝元陵獻官歲酌禮後坐齋室忽有蜘蛛
垂於簷端揮之如前余曰彼乃喜虫也有何相報
之事及復命入侍于重熙堂曾以濟尹辭憲廟之地
也伊後多年夢魂長繞黃緣事會今忽復入沐物位

置一如舊日自不無梧雲之感也

大官榮養

余每存古人懷橘之意凡於宣饌之會必果饌品而歸他人別無所言惟游觀金公舍悲視之蓋公有至行而然也余入閣未幾欲為榮養求水原留守大臣之為居留雖有新式近於左遷則無故而求似非也惟余之為世皆諒之

大臣居留

故事大臣居留無可據哲廟朝朴公晦壽李公憲球金公道喜為廣留華留而以樞銜兼帶也凡居京司

文簿皆以判官舉行狀啓書目回題政院不得為之以書吏私通補相位使道古之使相未知如此也

宿城屯辨

景福宮役所看檢事諸大臣俱會余雖居留以原任同叅游觀金公欲知華城事先為發言余未及答元輔趙公招籌吏曰回啓姑未入呈耶余驚曰何事乎取看啓草則因錦伯狀請華城所管宿城屯還屬平澤事也末曰平澤之還推事理為當使之永屬可也余向趙公曰事關水原則閣下豈可直斷而措辭中何無開問該營等語也諸相皆然之伊後公文下來

閑問之句添入而永屬之云依前也余曰既閑問則何為永屬既永屬則何為閑問乎因疏述居留心庵亦鮮相職此乃忽地風波而後心庵摧謝不已可見其虛懷也

大典會通編輯

大典通編成於正廟朝而伊後列聖受教定式多有載錄者通編之名改以會通命開局編輯心庵趙公頴樵金公炳學及余俱充摠裁之任會同於芸館心庵則擬廣卷數余意則欲為隨類附錄議論不一洪悠齋鍾序時在校正分析立說竟以分類載入磨鍊

文獻備考續纂之役

余於會通編輯之役竊有所追惜者記昔憲廟乙巳雲石趙公請續成文獻備考上可之於是雲石為揔裁余與趙暘谷鳳夏並差都廳之任行之未久余則以行臺出疆雲石因病解去而諉以物力不敷遂至廢閣是書卽英廟相臣金公尚喆所彙輯者而為國家大文字則續編之役烏可無也雲石有見於此所以稟請施行而未免中止後更無繼雲石者也

孝貞公藻鑑

余幼時甚為孝貞公所鍾愛常稱之以吾善之命名

曰元蓋善之經山鄭公字也元卽其名也鄭公二十
登第余四七策名而鄭公拜相之日余為託注官後
二十四年余亦濫登台司又五年猥隨公同備鼎席
公於余內子為世父也

鄭門回朶

鄭叅議東勉過回朶之禮其侄經山公先繼之經山
之弟東里公憲容回朶又屆於戊辰季秋公則裕元
之外舅也余同內子獻壽經山相國無恙上坐余以
相國之同班叅於獻酌之列旁侍者公之子吏曹叅
判基會徑右贊成基世水原判官基命從孫內閣待

教範朝而冠珮濟蹕風采輝映外孫則余之子壽榮而鬕髮森束古人云仁者必壽賢者必有後然則鄭門之福尚未艾也

回卷詩

回卷之禮東俗也因賀製詩者甚多無如鰲恩君回卷時琶西公所作也其詩曰新婦新郎同白髮今年今日又紅絲至今傳誦為名句

守先訓不出仕

仕宦者有情勢不出者多而守先訓不仕罕矣余之重拜相職也引先訓不膺蓋先考嘗諭余以五十後

則勇退故也聖批若曰君臣之義天地之常經移孝
為忠古今之同然又曰卿於忠孝二字懇懇為言慮
國忘家惟以見斷斷之誠矣卿以年前拜命由於返
面之重觀光之意則先戒雖功國事亦重又曰卿所
以求退者為先訓也先訓雖不可不守國事亦不可
不念辭旨鄭重猥以人彘閑頭見職未解之前跬步
難進之意附奏上乃下未安之教許副相職心廬歎
曰此一節吾所不及祁堂洪公語榕溪尹公定鉉曰
橘山立此大節不期然而自然非人力之所能也

夢中作詩

余於解相之疏無附乞骸之辭是夜夢有詩曰旗亭
縹緲送斜陽卧念初心陋漢唐今作白頭無用物他
時何面拜先王此果出於性情而然乎其所自訟則
誠可笑

特諭勉留

余在鄉頗久一日上謂領相曰李判府事居外許久
尚不上來有何情勢而然乎旋除藥院提舉不得已
上京入侍於講席上曰卿之久不登筵何也以居鄉
近數十年而有可叅公故輒為上來之意仰奏講罷
下詢曰何時當還鄉乎久在鄉廬不如多留京第之

為好笑又教曰鄉廬則時或往來恒留京第是予之望卿若在京而常常見之則予心每好矣

三相分兼提舉

適因老大臣之或休致或病患以致眾提舉俱有闕於是時相二員及余一人互為分兼或多至六七窠然老大臣之不致仕自致仕之說盛行於世此乃中書初有之事也

原任相兼武府

三軍府復設後該府都提舉例以時任大臣兼之原任則不闕也賴樵金公特為立論依政府例原任一

體兼帶啓請定式得體也

筵奏先後

已巳南至日入侍也上時當同氣之戚以先公後私之義先奏南至頌禱之辭而仰祝慈聖之壽繼卽奉慰蓋折衷於衆議而余以班首舉奏也

補慶典禮

王大妃四旬補慶未有依據之禮謹按國朝寶鑑明宗八年春正月上上壽于王大妃殿王大妃殿王大妃卽仁聖王后朴氏於明廟為昆弟行也援以為例只行告布親上表裏箋文

御書恭記

自古人臣之奉宸翰以為榮耀者不一而未有如賤
臣之受賜也戊辰聖上書下橋山嘉梧室五字橋山
卽臣之賤號而嘉梧室者是所居巷名也未知聖聰
何以記存而垂此分外之異數也於是建閣而奉之
諸長老以文賀之比畫見魏野居也

書冊頒賜

臣於憲廟己酉承國朝寶鑑之賜哲廟庚戌承列聖
誌狀之賜壬子賡詩賜陸奏約選己未賜國語庚申
賡詩賜古文真寶當丁乙丑賜膚陵誌狀庚午賜史

記臣於筵中奏曰御賜書冊卽私家之永寶而子孫
守以為業則此乃教之以學於無窮者也今於廣布
之下所領諸臣孰不肄習誦讀涵泳乎作成之化也
上曰予所頒書欲以興學也謹此附記以識聖學之
篤推以及人也

四朝寶墨

純廟以御筆特除孝貞公官憲廟多宸翰之下於賤
臣者哲廟留寶墨於臣之應製試券當字有五字之
賜建閣奉之重事體也英廟朝曾多是事金相尚喆
建閣端上李相台佐建閣梧牧里俞相拓基崔相奎

瑞皆有所建正廟親製七律書下徐相命善今序東
所在閣是也余之所奉卽四朝寶墨合奉一室鄭周
淡作偉文李丹農裕膺作記

冲年御書

憲廟冲年嘗書大字賜進講諸臣抵廟亦書龍字賜
登筵承史若李台源命權令應夔諸人俱承受者也

便殿御書

哲宗朝直書思無邪三字刻揭于熙政堂登筵諸臣
多以是陳勉當字亦書安民二字刻揭之

三朝廣詩

憲宗朝聽蟬詩哲宗朝春和詩小酉齋詩耒老閒亭
詩杜稷祈穀祭詩奉謨堂詩大報壇詩華城巡城詩
當子朝水原行宮詩玉堂政院內閣詩并賡進

回榜老人相戲

蕉泉鄭公文升之司馬回榜也經山相公徃呼之蓋
經山之過大科回榜殆將十年笑經山為八十八歲
蕉泉為八十三歲而兩公之精力依舊韶顏華髮交
映左右洵熙朝盛事也余以四字詩賀之曰元老來
止戲及華顛

心庵病革不亂

心庵趙公卧病頗久易簣前一日余往問訊公扶起
端坐言語有序及卧以手整其冠少無迷亂底意有
以知平日學力之篤也

下詢邊情

余進講訖上曰北道元無大米乎臣奏曰本道大米
南關則有之北關絕無而僅有地是硯瘠故也其用
小米如他道之大米也上曰彼地雖隔一江不足為
界限云果然否臣曰六鎮絕遠道臣無以盡知而其
責在於北兵使苟為得人任久然後始可奏效故臣
於年前曾以該樞久任之意仰達笑上曰其時北樞

誰也對以李南軾上復詢六鎮事甚勤臣曰界限不
過一葦杭之之地也鷄狗相聞聲氣胥通彼人能知
我俗我人亦認彼情風味性習似無分隔矣上曰言
語亦通否臣曰居相近也故果能通解而無異於同
居云矣

聖教恭記

上於講筵謂賤臣曰予讀經傳每見堯舜之事則雖
有欲行之心行之為難臣對曰此聖人之言也非知
之難行之惟艱苟能知其難行而惟日孜孜則工夫
漸進易躋於聖敬之域今此聖教實為躬行之本凡

堯舜之事非高遠難行在日用事為之間殿下若點檢常行之事無不昭合於理則是乃為堯為舜之道此亦求之在我者也

冕服不用錦緞

講筵賤臣奏曰留有餘不盡之福以遺子孫此慎儉德之謂也上曰予亦知其如此而見侈靡之物則不能無好之之心矣賤臣曰此聖人之言也冕服之不以錦緞用我國織組是崇儉之本純祖見一絲一粒輒曰毋或有害於民殿下可取以為法上曰卿言正合予意

親耕耤田

親耕列聖多行焉觀刈英廟始行之蓋帝王之盛事也當丁辛未春舉是禮乃選吉日親祀先農壇仍為親耕耤之已例耒牛五推按法而已上執耒推牛屢行田畔卽召耆老及農民宣賜勞酒此乃百年後始有之事也軍民觀光者舉有喜色及夫西麥之刈亦為臨觀大聖人重民事之盛德孰不欽仰攢頌也秋乃大熟耄艾歌詠

親耕時奏辭

親耕時諸大臣入侍俱獻頌禱之辭余以首相先奏

曰今日之禮百年盛舉也上以供粢盛敦孝致恭也
下以成訓化務本厚生也我殿下親裸壇祀於吉度
之日庸寓孔風之祈又棟元辰載黛耜青箱奏笙歌
詩章以千乘之尊遊塲染履行五推之禮綸綍渙宣
命布農事道民躬親示聖人順時行化之意圜堵觀
聽孰不蹈舞於受爵飽德之下乎昔麥邱老人獻言
于齊君曰願賜一國之饑者此頌禱之善者也上動
聽仍詢曰麥邱老人之說卽齊桓公時事耶

大臣製進綸音

上親享先農壇命時原任大臣入侍余自鄉未及到

領右相登對命領相製進勸農綸音曰卿曾經文衡
製之可也金公不敢辭黽勉應之命大官之代撰絲
綸新例也

經山徵文

經山相公所作文稿為三十卷之多一日出示余要
製并卷之文余諉以待剞劂時奉副公笑曰何必遲
待也吾猶及見好矣於是忘拙搆呈公手書荅之曰
似此難得之文何用靳持耶元老之獎詡還可愧也

元老製文

余撰嘉梧藁略十五卷仰質於經山相公公作序文

而歸之公時年八十九也文體之絢爛宏肆不下於
少壯之時年雖邁而精力無減可為文苑初有之事
也

經山紅帶

余妻禽鄭門年纔十四時經山公東一紅緞袷帶時
年四十餘已陞亞卿方拜東伯黑頭宰相拂拂紅紫
望若仙標後四十五年謁公於南麓小第韶顏華髮
談笑娓娓而腰間所帶卽舊日所見者也余以一狐
裘三十年仰贊公掀髯微哂謂余以聰明蓋公耄期
延文潞公福祿似郭汾陽而清儉則不讓於是乎仲

矣立朝七十年職補繡衣者殆近三紀之久而德業
彌隆聲聞益彰如余眇末猥隨公後愧無一絲之有
補也

三四帶

經山公有屏帶曰三四帶回甲回婚回榜所帶者也
世稱福帶凡過婚者争相借用三四之名古之所罕
也

砲糧米議

當字辛未夏美理駕國人率兵艦五隻來侵江都閬
月乃退廟議謂沁都形勢賊來必爭之地於是領揆

賴樵金公奏以田每結加歛一斗米俾作該府養兵之需請收議余獻議曰洋醜之出沒我疆已有年所而犯沁都者再矣蓋沁都拱護京師最為海防要衝之地前後朝家之致意未嘗非綢繆桑土而內寅以後每一有事輒發京營軍使京都半空有非重根本之義也今此大臣所奏增兵添糧實有經遠之慮臣意則三四十兵卒猶為不足五萬石糧米尚患不敷雖不援倣於三手糧稅外之賦何憚而不為乎古語曰有民然後有國其在戒嚴之時有國然後有民田結之添排斗米民必樂為之助矣臣先祖文忠公臣

恒福當壬辰之後請均田制奏曰為國家者先論財
用然後乃可以治兵繕完鑿池築城古人問兵數賦
而對者良以此也顧今兵糧足則其兵可足然則內
外之鞏固民國之便安奚特一沁都而已哉

夢應廣詩

辛未余承秋到記主文之命明將詣闕曉夢有人書
贈一句曰看到詩人意不到覺而思之莫解其意及
懸題後上命入侍書下三絕句教曰此乃日前歷臨
玉堂政院內閣時予之所作也卿其看之字句間未
妥者須為論奏也臣擎覽訖奏曰玉堂詩君臣情志

自流通之句孰不仰聖志之允孚也政院詩宣布德
者達四方之句孰不仰聖德之克廣也內閣詩建慕
義牆見帝堯之句孰不仰聖慕之彌篤也三篇之中
包括甚大臣不勝欽頌上曰大臣亦為廣進也日昨
歷臨卿雖未叅卿於館閣喉院俱經長官何嫌之有
旋命催製即為搆呈上曰卿詩甚好儘大臣作也考
試之中何能如是速就乎臣曰臣學本荒莽尤於詞
章非其所長今日廣載與有榮焉而恩褒鄭重惶慙
則極矣是日登對以廣詩之故有此玉音之承聆誠
意慮所不到夢果異也

虛懷考試

凡主試者每以我心之有無點彼榜之公私苟能虛懷考試則有何異議於其間哉余為到記主文所選者為十人而就其中九人俱是名場屋者也有人謂余心虛靈故能如是嘗聞經山相公之言曰運通時主試則被選者皆實才運蹇時則雖公心做去未免用私之目也

仰勉保衛

藥院入侍也上曰予有火氣欲進童便何如臣以都相奏曰醫書云洩盡真藥服假藥十字街頭買秋石

臣敢以是詩仰誦上顧之語在景岳全書

經山就養

辛未秋經山鄭公就養於家子南城居留任所公以
耄期二年難於行程家人交諫公則不納指日啓行
公之此行凡九次成川江都完澤廣營長子基世之
所奉也白川瑞興次子基年之所奉也洪川水原廣
州三子基命之所奉而與夫人同就居其半此外尚
多未就之邑也

鄭門五軺

經山鄭公之子基世秩一品孫範朝秩二品公則七

入中書而三世閣臣副學公之弟憲容蔭正二品其子基曾秩二品一門五軺國朝不多見者而且繼承之後俱是鸞鵠停峙其進猶未可量也

趙門福力

養亭趙公得林與其季弟秋潭徽林俱秩崇品而官吏判弘提漕亭之子憲變寅熙字熙秋潭之子立熙皆次第登科憲變字熙玉署寅熙立熙翰林養亭仲弟徽林牧使憲變仲弟容熙及寅熙子重軾迭為登庠牧使之子與憲變之子並有科望其門戶之盛福祿之厚可頡頏於鄭門而科甲過之又況一鼎食者

上下百餘口乎

門閭相同

趙星山所居之宅卽余舊舍也余嘗居十年而先大夫秩崇品官銓長文任余則經亞銓今星山之居也亦以崇秩過銓長文任其子埰夏方帶亞銓門閭之赫相似至於余之西堂四甲也余雖官三銓曾經方伯也星山與其夫人過四甲也其子已登宰列是亦同矣而余之未及者惟其後承之蕃衍蓋星山已得曾孫也

翰林詞

南門外有八翰林洞知退堂李廷馨為翰林其兄廷
璠其弟廷璣亦為翰林其孫慶相慶桓慶果曾孫燁
與煦皆為翰林人稱之此余同派族也

榕溪撰文

榕溪尹公忘年於余而余所景仰者也公際遇明時
出按節鉞入掌銓衡前後二十年之間宦業非不壯
也而愛人喜施家無儲蓄之儲公則處之晏如引年
休致圖史自娛著述之富幾乎等身余往拜必與之
討論文字亶亶不已拙作亦多仰質之公以八袞之
年嘗撰余壽藏記四時香館移建記御書跋嘉梧藁

略序俱巨篇也常囑於余曰幸攝我生祭文示之余
笑而諾之公曰公之酬文必有之事遠則未主之前
近則玄几之下無若生而見之

老年書金石

蕉泉鄭公素工書老猶矻矻余有金石之請公乃欣
然應之余於老人之文見經山樸溪西公於老人之
書惟見公也蓋其詞鋒之富麗筆勢之遒勁無減於
少壯時天賦既厚造詣彌進誠非人人所可跂及者
也

聖誕有據

大殿誕辰每進頌禱之辭余以聖誕二字措於奏語中心慮以其無見於書籍為訝余摺冊府元龜中聖誕篇實之於是釋然

筵體之變

余在史官常見大臣入侍郤次凡日講考試等進叅也必先行其事而後進前問候矣近日則毋論某入侍先問候後歲事乃彛齋權公變其例也其言曰先陳多少說辭後請聖體之安為未穩此言誠是也

中書故例稍弛

嘗於問安之日余以左揆隨元輔趙公端揆任公會

於政府聞原任諸公追到於樞府朝房而無傳喝之
先唱者趙公曰中書事漸弛矣右位大臣既臨樞府
吾儕不先問訊為可乎蓋心庵頗講古例故有是言
也

相臣相揖部次

大臣齊會時錄事請相揖例也政樞西府錄事互爭
先後樞府讓於政府久矣潁樵金公曰錄事之告相
揖也右位錄事當之原任是右位則樞府舉行時任
是右位則政府舉行可也由是遵行

大臣座次

相臣座次從來截嚴而近日則所謂按息各排於諸座賴樵金公以其不可卽撤去之只存右位之座先是賓廳之會余年雖為知命猶以最少稱每設屏風限之英廟後初有之事也未十年余居然充首班而新卜諸公年皆為下向日屏風束之高閣

政府銀印

世祖以潛邸為領議政時所用銀印藏於政府其文議政府印四字用朱蓋也每安於大文書余曾以舍人一用之後以時任相一用之甲子後見失今所用者新造也其印之入闕內必由正門卽廳陪行其所

重如此

大君印

大君印以銀鑄之用朱蓋舊藏宗親府今在雲峴宮
制度與政府銀印同

大臣倂問之禮

僚相每日遣錄事相為問訊而倂來則以相敬之意
必正衣冠應之悅近漸弛至若卿宰之於大臣倂問
也起而聽之是古規而無人知之惟李判書載元能
行之云

大臣見岳翁禮

甲子余自北還外舅鄭公問心庵見其岳翁徐判樞之禮蓋徐公同秩也耆耆也無以為援余先拜之公答拜而口恭書札尊之而曰某拜近日朔例也

輔國體例自別

輔國秩是正一品亞於公孤也見大臣有門望而近則無之然他禮如前大臣下席迎之與僚相一般而但無下堂之例卿宰之待輔國也從一品則自稱侍生拜於闕外從二品以下古者下馬於門外近則雖下於門內無門望及呵殿聲其於國舅則或有納刺之例云

輔國藥院提舉

輔國為藥院提舉則與都相一行坐蓋此禮黃山金公追根施於斗室相公云而後援為例然或行或不行入侍則提調之由西階自如也

輔國宣麻

大臣致仕宣麻文也例為親臨而卿宰則無之惟於輔國或有親宣之舉哲廟行於榕溪尹公當宁行於李公敦宇盛事也

外任入閣

古之以外任拜相者不可盡記而關西則惟柳公灌

李公元翼鄭公景良金公尚喆李公徽之京畿則金公若魯湖西則朴公宗岳關北則鄭公光弼金公憲及余也華留則李公敬一權公敦仁若甬人而已

藩任拜相交龜禮

大臣坐房中新伯奉教諭書入正門坐於廳上大臣使錄事替送印符禮畢新伯退以夾門呈公狀入謁大臣起而答拜未出仕故也新伯退出呈陪行狀大臣仍率營屬離散中路退送

大官異數

余於慈廟請急之章伏承湯節奉慮之批世以為榮

年前顧樵金公以有老親歲首蒙衣資食物之賜亦異數也聖朝優禮大臣如此

太常郎官峻選

太常判官任則為重而以其自辟也故人皆尋常視之雲石相公始選峻望辟洪祐健沈澥淳然伊後則漸不如前余為提舉也思所以復舊於是舉朴齊教金聲根李炳教李龍雨李承宇朴定陽朴顥陽金裕行崔鳳北徐曹淳李源逸朴鳳彬洪萬植諸人或以典翰或以舍人俱是翰注出六者也由是作一名宦可謂官隨人貴也

相臣方席

老大臣於禁中或乘藍輿或乘方席俱古規也哲宗朝許乘山輿以其輕便也當了甲子後復為方席蓋輿與席隨時而異其實無間也余於燕京見禮部尚書乘紅輿於闕中且或有騎馬出入者聞有皇賜而然其防限則為嚴云

軍門都相為客官

各營體例都提舉照管事務大將則節制軍卒而已記曾國舅為將任也一都相盡送公事俾為裁決自後援以為例挽近待都相如客官雖上納敗牒等啓

目不為未告凡文書行只受署押而去不其近於藍田丞乎誠可笑也

槐院公堂本末

承文院公事堂上例以文衡兼而其於未差時副提調句管公事即古規也若無副提調則大事都提調照管小事則分付諸堂中有聲望人使之看檢正廟朝如是行之純廟朝別差一二人為堂上後遂廢哲宗朝大臣以不可以傳語句管公事奏差有司堂上余於是首冒是選自後為例有闕則草記差下而有司之稱變為公事焉

檢詳坐起尊先生

李副學明應之為檢詳也坐起於凝香閣心庵趙公以先生徵其古風所捧之物行下率隸余亦在座曰此亦有先生一人一如趙公之為因相笑而罷

檢詳廳

檢詳司獄政故名之古者亦隸於刑曹也是以檢詳廳一在於秋曹然無檢詳坐起之時今作空廳余曾以秋堂見之

居家好規

顏樵金公朝起必早膳曰今日之事綽有餘矣余聞

而是之郭泉鄭公弘淳見新進人必勸早起遺矢以
便當日之事蓋此二者雖尋常間事誠切當也夫有
食必有矢每日身上事豈有過於此者乎余於登科
後思鄭公言朝輒淨手近日則効金公事亦為早膳
可作中書故事

道伯見守令式

古者監司見守令必起而迎之恩谷相三十餘為湖
南伯自以年少未可彈壓請於廟堂始行坐答之禮
由是為例然相敬則嚴雖牧馬之官秩卑之人舉皆
盡禮不害為兩得之也

假都事與監司交龜禮

監司到五里程幕所假都事奉印符入親獻後坐於
樞外候禮畢退出入無拜不問候延命後始行管下
事

道臣或不得直開京司

余按南藩也先大夫判禮曹伊時有開文事則必開
於該卽是罕例也茲後如余所當者未聞有援用者
為人子者不可不知也

去運餉銜

兩西運餉之役卽丙子後輸穀於藩館者也箕營設

管餉庫海營亦設是庫而每年儲穀於關西而箕伯
兼管餉使濟尹兼運餉使苟有輸運則濟尹與本道
伯互行關文而其於延命也去運餉銜只稱府尹至
若他道則無拘行關也

大臣首班之避

韓晚悟用龜每當時原任入侍之時必探李忠正時
秀之進不進而行之李公若不入則公亦不入蓋登
對之事首班主之而韓公在於李公之下故避意外
之事也

別魚從陞

淵泉洪相頤周嘗言近來別無春秋之從陞殆無防
限矣古則左右史外雖預備翰林亦不得從陞而凡
於公故俱參於百官班至於閣臣之檢校多數亦非
也余攷古事淵泉之言果然正廟朝差減檢校若承
旨之通易

翰林春秋不得減下

翰林例兼春秋銜而雖有應避不得減下也朴坦齋
以其大人承旨公帶春秋銜乞通翰林吏曹回啓承
旨所帶例為減下坦齋難安陳章徑出為當時美談
惟議政春秋與翰林為應避則翰林通史官無春秋

銜則不得行公故也余於經山以是見通趙定熙於
余亦如之惟別無則無似此之規也

右史為政院郎

下番翰林是政院郎官而有叅謁於承旨之例故每
朝以下番有身病不得廳座呼望而今則廢只受政
院驅債而已院隸雖管於右史凡於使役認以為客
反為主誠可笑也

武班峻選

武職中訓練中軍為峻選故或未得通望於此而有
登壇者蓋其見重非禁別捕將之可比也昔李大將

得濟之領訓局也性好園棊與李身敬者課日對局而時適中軍有窠無以排擬將以二望舉之身敬請曰如吾者或可叅望乎將軍止色曰僕與君雖親近此職不可濫也言于吏曰吾之子可通然何必以父薦子乎竟以二望入啓其峻選可知其子卽石朮也

武臣上疏

古者武臣班至亞將則皆為辭職之疏止廟教曰亞將上疏太酸矣自是亞將不得為之惟登壇然後無碍蓋將臣則體例自別故也

大官無相避

古則大臣亦有相避之規故右相趙文孝翼於李鈞
巖時白以婚家引義因大臣議教曰相避在僚官不
在於台鼎之位鄭翼憲太和重卜時其弟致和奉使
赴燕未到高陽劄辭許之金忠翼尚詰與從妹婚徐
文忠命善同拜相徐公引避不許南文獻公輟於韓
翼貞用龜為侄婚然同在時任而不避余隨經山鄭
公重卜而亦為侄婚故辭疏引及以無相避承批卽
成例也

宦蹟同門內故相

梧川相公諱宗城於余為從高祖也公二十司馬三

十六登第余二十四司馬二十八登第公南床余亦
南床待教檢閱注書公曲翰漢學教授銓郎余檢詳
訓鍊正公按廩及奉使屢余入繡抄掌試清南行臺
赴燕公廣州府尹余義州府尹公槐院籌司副提調
余知申備堂公副提學余亦副提學直提學公藝文
提學文衡園余兩館提學公以幾伯加資經錦伯北
伯箕伯余以北伯亦為加資經完伯海伯公廣州留
守余水原留守公通擬兵判未經余亦如之公以正
憲拜左相余以宗政拜左相公禁衛都提調扈衛大
將余御營禁衛都提調公以好名屢承嚴教余亦得

好名之目公嘉善後卜居湍上余亦亞卿而退居楊
楸公有一子二婿余亦如之公宦業富而相業少再
入中書一次出膺余亦如之而相業之有無尤不足
論也

李門三派相臣

益齋先生派有左議政華谷公慶億菊堂公派有右
議政貞翼公浣尚書公派有領議政文忠公恒福左
議政忠宣公台佐恩谷相光佐領議政文忠公宗城
左議政孝宣公敬一判中樞裕元也

龜川不祧之典

龜川先生不祧事雖有公議歷久未成按廟於亥經
山鄭公奏請施行世皆稱之挽近則賓對一次至請
數三人之多也

桃李村記事

古之牛峯即金川郡也桃李村曾隸其地今屬開城
府惟我李氏先塋也益齋先生以上墳墓俱在於此
又按舊譜則文僖公諱世基之墓在牛峯桃李村云
故余曾往審則益齋墓右有一大塚舊日禮葬者也
似是文僖公墓而驗之無憑惟石櫛實黃土而已設
壇於下望而拜之同閔徐西壇之例也

省謁先塋

余自少時期謁先塋至三十年乃竣或因公歷入或專徃省掃非惟祖先之山雖旁親之墓亦皆遍謁是余畢生事業也

金石合錄

惟我李氏事蹟溯自西漢五鳳年間至于近代搜括無遺彙成一冊活字開印分之宗中一門之事瞭如指掌名曰李氏金石錄其筆蹟則自益齋先生以下雖寸紙隻字亦得薈萃次第分粧合成二卷每帖各具字諱年壽並將履歷事業撮要記之以及子孫

某今為某派俱為懸註叅證悉備此與歐陽公集古錄果能同傳否

李氏花樹室

鎮川縣草坪者即李氏眾族所居也建一草屋作為宗會之所石坡公聞之書贈慶州李氏花樹室七字奉而揭之亦有序文藏于室

萬卷樓

草坪有萬卷樓澹軒李公夏坤所築也藏古今書籍以至醫藥卜筮名筆古畫累百帙因為號之用益齋先生故事也傳至百年今皆敬逸所餘只肅宗以前

名賢文集而已

李氏影堂

陽湖影堂安李氏六先生遺像俱是曾受俎豆之位也姑無祀事之舉其後孫之貧寒可知余於嘉梧谷亦建一堂奉祖先遺像共十一位或以初本或以移模粧成貼冊安于同函並與先蹟藏之非為暇享之義蓋欲傳後之忱也

金帶說

余家舊傳金帶云是帶此則匪久為一品及余之身其所帶亦不過數三年故聞之者皆欲之幾乎無人

不帶今不知在於何處抑帶果有徵而然乎必為崇
品者始得而帶之歟

名山歷覽

余於畿內見道峯水洛南北漢永平八景及崧岳朴
淵摩尼鼎足彌智龍門雲岳懸燈瑞雲青龍等處關
西則見練光澹澹統軍降仙黃鶴百祥等亭樓湖西
則見四郡俗離聖住青蘿鶴龍儒城扶蘇白馬等地
嶺南則見大小白山鳥嶺龍湫通度寺嶺南樓湖南
則見邊山格浦法聖七洋萬馬洞松廣金山兩寺海
西則見九月首陽正方結浦等處關北則見釋王白

雲諸寺石門龜景等臺關東則見內外金剛嶺東八
景及雪嶽昭陽等處此乃四十年間所遊賞者也

四都八道公私行

余作沁都之行為縣史也開城關西之行為使命也
龍灣之行為府尹也湖南海西關北之行為道伯也
華城之行為留守也湖西京畿嶺南廣州之行陪王
考及先考任所也關東之行無階可為乃於省墓之
路歷覽憶幾年宦蹤浮沉於營邑半世光陰消磨於
輪蹄而畢竟所得惟是數莖華髮還可哂也

西南伯煩劇之別

雲石相公嘗論嶺南湖南公事之煩處曰嶺南則苟
若頓飯不能順下必需茶飲湖南則腹雖果然足可
順下蓋公俱經兩道故其言如是而余在湖南多需
茶飲而腹猶未便也經山公就養本營猶曰君公事
之餘鎮日看書云才有定限也

銀貨有靈

余在咸營時一日封樁銀庫無故額壓甚恠之際見
度支關文即銀子子兩作錢上用事也第庫舍之額
值於斯時或幾百年不動之物將有靈而然歟及通
歸廟堂又欲有是舉余以重儲將陳劄防之章而得

保餘在

完營封樁銀

各道封樁之有銀貨例也而完營則不然也余在湖南因水災貸賑庫錢五千兩為賑資徑歸未償及按關北擬報其債而仍念本營之無銀貨以其數質銀代送俾作不虞之費掌吏輩欲殖其利道伯鄭健朝嚴斥之其所典守之方極意措劃以至獲全

荒貨商帖文

余在灣上迎回還使臣於江頭見着平涼笠者數三百伏於路左大驚問之皆是荒貨商而其頭目有缺

則八道商僧定淫受帖文於灣尹古例也

廢朝墳廟

燕山君墓在楊州海等村其外裔相傳守護者也尚有舊件衣服藏于墓舍每秋使巫覡賽神便成年例云余少日讀書東墅曾一見之其儀甚褻意欲禁之舉村交諫而止光海君墓亦在同縣赤城洞

麗王陵

麗陵象設之石物別無差等而或有退排於十餘間之外者蓋堪輿家有退排之說而謂私墓穴弱處也烏有君王陵寢為此苟且之事乎勝國之尚風水而

信術數此可見矣

仁陵遷奉

仁陵自交河遷奉廣州即英陵舊壙也其始役也奉
審則壙中用石槨天蓋無合縫純用一石銀釘以鐵
鑄之槨內畫左青龍右白虎南朱雀北玄武乃櫨宮
制也上雲氣下鐵網為二層使地氣升而防蟲蛇之
屬畫法神動采色如新其中有獸骨蓋麗俗於桑壙
投牛馬骨穢之國初事去麗未遠故也毀破本壙更
做新壙識者惜之

玉江說

鴨綠上流有玉而玉在江中出現如烏頭不知水底
所沉為幾許也船到處輒蕩漾不留所以人不得以
知其淺深神鬼之秘如是也海州產玉青者可作器
用白者在絕壁上姜君彛五格物者也其言曰是東
國第一品其坊名碌達

自溫臺

路過白馬江見水中有一石峯依崖而立上可以坐
十許人名曰自溫臺謠傳新羅義慈王遊於此巖巖
自溫故因名云

皇賜玉笛

東京玉笛云是三韓舊物人皆稱之而不知更有一
焉在昔長陵朝忠章李公忼卽菊堂後裔也丙丁之
役力排和議崇禎二年皇孫生公克進賀使艱辛抵
山海關已為賊所陷因孫閣部承宗得解隻赴京帝
嘉其苦節引見勞問仍賜青玉笛及白玉笏蓋異數
也公不幸病卒館中帝悼之命給金字牌送喪笏與
笛亦隨而來笏則不知下落笛尚在於清州白雲洞
舊家余取而見之色微青有斑文長三尺三寸圍四
寸體具三節十二孔乃銘之曰玉之德君子比非公
無以賜節三才孔十二非公無以試商應律爾天地

惟公之義

懷古詩

東京懷古曰悠悠往事問無憑極目蘓條感廢興流
水一千年故國寒烟四十八王陵瞻星臺上飢鴉集
半月城邊野犢登汾皇寺畔柴扉掩寒橋孤渡夕陽
僧松京懷古曰雪月前朝色寒鍾故國聲南樓愁獨
立殘郭暮烟生古人懷古詩得格最難東國尤無所
傳錄二詩傳之

裴堂詩才

尹裴堂為安岳守與監司心庵酒席唱酬次百餘韻

於頃刻之間沈菴堂膺恭目見之後尹公貶歸於心
庵之手世以為當日事云余未之信到海營詳聞之

南金陵不與人較

南金陵公輒為相判事務戶判沈斗室象奎疏曰廟
堂事全無料量南公對舉疏曰昔唐介駁文彥博而
彥博不為較挈情誼依舊臣於象奎亦然時論偉南
公而沈公繼登台司傳為美談

七山漁艇

法聖鎮東臺上遙望七山海洋形勢歷歷可收每當
石首魚上來時打採之艇羅列海面宛如蒼蠅之附

陸其數不可量矣所採之魚隨而夥然而每以魚農之歟報營報司習以為常以致稅額日縮管地方者烏得卸其責乎余亦歷覽而其委曲實未能知也

契樹驛

村有金蓋仁者畜一狗一日出行狗亦隨之金醉寐野中忽火起犯之而不之覺也狗獨力救之力盡而斃金憐之瘞于野植杖以表之杖因生葉名曰契樹余巡部過此見驛誌如是云

嶺箕兩任相忌

世有嶺箕兩道伯並經者不吉之語心常惑之默數

余所見之人果有微驗李公肇源金公魯敬李公鶴
秀鄭公基善趙公秉鉉李公紀淵洪公在喆李公景
在南圭癘秉哲曹烟巖錫兩洪藹士祐吉皆經兩道
伯而或遭彈或泣珎或毒憾或遭憂或身故任所人
之為言未可一一信之而自純祖朝後至于今日所
見者如是極怪也

完山題詠

完營燕申堂冠陽李公題詩曰安石榴花箇箇尖朝
陽微雨見纖纖棋朋坐睡琴娥去一樹梧桐碧滿簾
歸鹿相公次其韵有晚揮朱墨登樓去十二闌干妓

捲簾之句人謂李公得其清趙公得其富曾見梧桐
而想其詩近則為人所斫云物之壽傳莫如詩文也

松廣寺異樹

順天府松廣寺前有一枯木不知幾百年物然枝幹
色白如銀嗅甚香烈或曰白檀天章庵有樹名曰北
向樹其花紫色開必向北壯健者搖之乍動而已小
兒輩撼焉亦如之皆余巡部時所見者也仙巖寺亦
有佛杖樹云未知羣芳譜中亦載此異種耶

松廣寺佛器

松廣寺有金鉢五合無大小相合又有機欄髮鞋佛

牙天安廣德寺亦有佛牙及古鏡鏡是前後受照者也永平白雲寺有木鉢如松廣之製

寺刹大銅器

連山田畔有大釜可容十石米新羅舊物也海印寺亦有大釜表訓寺有大甑可容十五石云

檜巖寺之廢

楊州七峯山有寺曰檜巖巖內巨刹也文宣王妃時有水陸飯僧之事糜近千石炊飯飯熟而色赤未幾有國恤後以多蝎見廢到今三百餘年階礎之底尚有蝎種之羣聚其色皆白嶺南廢寺徃徃有此等之

恠云

古綃天下地圖

壬申承留都之命在政府十日金晚齋同在直送示
古地圖一大幅可謂天下可運於掌上也其尾書曰
英宗四十一年乙酉春作帖備局舊有唐畫綃本中
國地圖廣十二尺弱長八尺強視他地圖頗纖悉詳
脩而置之庫舍不卽粧緘以致蠹傷破裂不堪展閱
使匠手韓戊辰補綴裱起作為帖子始成完本可以
久傳書其顛末於下方脩局吏主其事者金喜敏也
且有東國地圖屢十卷此古丞相府圖籍也

駕轎勸馬聲

英宗朝驪州幸行道路泥濘司僕轎馬無以善步近
臣奏若以驛馬駕轎奏勸馬聲則可以穩奉上許之
以京畿三牌入用三牌之謂其人三層作聲如出一
口故也上善之曰此為監司所用乎好事渠自為之
此傳為美辭正廟朝以海西驛卒善於三折音幸行
每選以用之

驪州幸行

正廟朝驪州幸行時大雨廣津艀船潰缺蔡樊巖請
廣留拿入上從之廣留即李公台永也有惠政於民

民負土填水婦女齋沙助之上感而安徐之艤艫隨以完憲廟朝綏陵遑奉也值大水橋梁盡浮曹烟巖為楊牧呼民求活民爭赴役事得就事異而孚民則一也

雲監生天文

正廟命雲監生池景喆入送中州得秘方習之事無不中一日大雨明將幸行召景喆下嚴教責擇日之誤奏曰鷄鳴後當晴果驗後為安峽縣監臨死以其方書投之火中使子孫不得習之其意專在於保家此亦有長遠慮者也

宿警

壬申三月齊學陵幸行時余在留都初三日軍號啓
下者乃宿警也忽憶前日軍號之議申飭夜中火患
竟無事是日大駕自陵所還御行宮風雨大作泥濘
如海幾天明還宮軍卒多死亡大臣至請先後廂大
將兵判竄配名將領爲首具宿警之語偶符恠哉

書丹校正

梧里李公嘗曰南窓溫堞校書之役最為樂事此言
果深得至趣也余鄉居消遣之砣砣不已者惟此役
也漸至衰老習與成性欲罷不能示可笑也

麒麟夢

英宗壬寅五月李孝簡崇祐在錦營任所遇其夫人
金氏回甲一門畢至夫人夢得一麒麟瑞光滿室授
其女使養之女已嫁鄭氏門者也女婿亦在營中是
月懷孕翌年二月生經山相公壽福昌盛事載李氏
宴會日記云

平泉無床奴

平泉李公平居極小心赴公私札不留袖中又不使
童僕傳膳以女婢替送關門外人問之公曰無知小
童若或深入禁地或打漏鼓則將奈何所以如是此

不無戒嚴者也

吏胥分曆

吏胥之曆書例封卿宰家未知朔自何時而起於雲
觀吏次起於銓吏之封於有官爵處此風漸盛及於
各司吏胥而一說黨論起後其所親者禁其通涉所
以遍封曆書要知其名字此說亦或無恠

秋史最慎字畫

金晚齋嘗求尚古堂三字於秋史秋史展紙數食頃
不得下筆其畢書揮汗授筆曰小心人所求不得不
小心書之余亦於金晚齋知之深故雖汗漫筆札極

小心而每每小心處必有疵恒愧其不及也

金吾郎

金吾郎為蔭塗之峻選西北人不得為之或有序陞
濫差者則終枳免新近則無碍許叅至若一都事上
經歷不許也古者上經歷謂之倭皇帝一都事謂之
倭皇后有冊封詔戲之此文流入大內英廟驚恠責
之遂廢其規

史官鉤硯

恭元殿齋室入侍承旨置兩鉤硯而書傳教余曰注
書鉤硯只一坐何為而複用乎對以一一是右史硯余

驚曰正廟朝翰林借硯於承旨事大承責教至有令
工曹新造以給之舉蔡相謂史臣冗官起一場風波
其官之重如此今日事翰規壞廢之故也因奏古法
之不然金領相請推史官造中皆曰承旨又當請推
余曰承旨奉書傳教所重自別實非私用也比史官
之借硯有異與領相一場相持上笑曰承旨予當問
備特推之諸臣皆以盛德事仰奏造退相顧喜之曰
一堂吁咈盛時美事也

龍灣所御輦

宣廟幸龍灣時所御輦今作空駕轎刻揭於轎內余

曾以司僕正見之未知揭在何時

戚里私覲之補

憲廟聖痘時諸臣入侍卧内豐恩國舅以承候官侍
坐必補小人余甚恠之出而問之此是私覲語也

小兒陽氣之說

小兒之善作戲者人謂之有陽氣以其有進就之漸
也純祖在冲年過於作戲正廟每憂之西堂李公奏
曰臣有一弟一子幼時不嬉戲好讀書年過二十皆
不淑以此推之陽氣不足故也今世子之多陽氣可
以慶賀勿為過加禁止盖李公積傷於弟與子之憾

也其弟年十九為進士其子二十九登第其翌年并卒云

九十脚病

余還鄉之路往拜經山公公方患脚氣笑曰公必於九十有此症也余笑曰九十後始患此症即八十年無病之人也公閱其平日所手鈔書籍余曰繁華富貴有厭飫之時棲臺江山有厭對之時方丈珍羞兩部聲樂亦有厭進之時至於日兩盂飯一案書終身不厭此於公見之矣公曰諾

李叅奉詩

李叅奉述元陵輓曰宵駕紛儀衛萬人惟哭聲問閭
遺子女城闕若平生過廟遲遲蹕臨門冉冉旌絳紗
千柄燭風淚曙縱橫末句其宗長某呼寫云

李教官詩

李教官在咸有失真病披髮坐廁中吟詩曰人間狂
最好天上雨何多人謂佯狂一日路遇金相鍾秀進
曰願聞閣下加資金公知其人對曰大匡輔國崇祿
大夫李曰小人大狂輔國無祿大夫其疎放如此

大袖禁令

辛未春禁衣袂之大古者士大夫衣袂無過一尺載

於經典而皇隸下賤爭尚廣大垂而過膝年少後生
艷其制日漸日廣至是禁其濫竇古制也余家有先
大人筮仕初所著上衣袖長不過一尺以此見之五
十年間轉變若此也

青袍之令

純祖庚寅翼宗代理有青袍之令五月後遂寢憲廟
乙巳年間又有此教舉世着青袍皆用苧老人及秩
高人或用紬未嘗有緞屬哲宗朝不廢之白袍只用
於問吊

仕女衣

士大夫家婦女衣服無論上下衣不用薄紗漸苧以其見褻衣故也其法久傳於世而挽近風俗渝漓世祿之家甚克由禮衣樣裝束貴賤不辨莫非侈風之盛矣洪慙齋鍾序嘗對余言是弊曰惟金思灝家不變古制云

問疾星山

壬申春趙星山有微疾余往問焉其第即余舊居也首先大人有患疾朴壺山以原任大臣來臨問疾其時余父子職品與星山兩世同今余亦與朴公同秩二十年間事不無愴感之懷而星山福力過人其疾

克膠案上有校書具階前列花卉叢四世同居和氣
融洩誠可艷也

戒多貯梅花

梅亦寒花也氣像極瀟灑多貯害子宮之說古已有
之人或以沈斗室證之以余所見南圭齋尊梅花室
藏奇品屢百本名動一世不數年圭齋歸道山其室
作人醋鹽供億之處前人之垂戒不無所見也

風氣之異

南北風氣有異南則風薰日蒸而西北則風涼日冷
而雨南則東風傷穀東則東風養穀南則西風雨晴

東則西風雨來皆余之所經歷也關北則與關東連界風土大同小異深北不然其土雖接東而實北地故比南關懸殊也

大臣子弟嫺廟務

鄭周溪經山相公冢子也相公居廟堂三十年廟務之雲委於前者周溪相其役所以巨細無事不嫺當今叩稽無出其右可謂相門出相也朝廷間惟大臣子弟習知尊大臣之禮故鄭周溪及金思潁炳也冀終始不失其規矩思潁荷屋金公之哲嗣也竊觀他人皆不及寔世俗之薄而不知故事然也

御真仰瞻時不敢承着眼鏡之教

憲哲西朝御容圖寫後命時原任大臣二品以上入瞻時余番番入恭而哲廟令趙相心庵着眼鏡而不着屢有下教終不着余以為與講筵有異故不着也逮當了朝御容入瞻時命賤臣着眼鏡又屢下教而憶心庵事不着之抑又思之則着眼鏡有妨於仰瞻以乍昏非明之眼光瞻望然後可以辨其得真趙公事至今追惟果兩得之也

抱書案

內閣有一古書案案面刻青山披風坐黃鳥抱書眠

書法超逸故問於老吏則曰此是故提學徐竹石在
直時弄筆而後諸閣臣愛其墨因以刻之云言其近
景寫字時即綠陰方濃抱書聽黃鸝時也先輩持續
中間適之趣可想也

存齋

故閣屬朴允默者正廟朝親近任役也以常服但着
巾出入卧內每朝代書諸閣臣答封書一日受答者
多集於閣門外上如廁急入內使之作答朴告以稍
簡上笑曰不為答則外間曰其人當死安得不答乎
朴雖存齋善書深得淳化閣法士大夫家多傳屏障

景福宣平門卽其遺墨之追刻也後為節制使
為人極穎悟而且謹慎余游坦齋門與之交老景扶
杖必尋余於南麓茅說昔年事徃徃流涕其子與孫
相繼為閹屬

記朴存齋言

朴君存齋之言曰平生一見報然事蔡樊巖遁入箕伯
其日有朝廷問安不迎洪嬪承言色曰後宮亦有問安
乎又有一可警事其時直閣徐竹石也蔡公使之前
曰悲哉諸閣臣皆驚問之蔡公曰君後當為箕伯而
幾十年間平壤物色必無足可觀可不為君悲哉

兩館提學并書職銜之規

古規兩館大提學各出弘文主試藝文代撰或以弘文書之者或以藝文書之者中古合為一爵而單付各異所以職銜列而并書至於提學亦然古則兩館各通別擬而或一人兩通則如兩館大提學合而列書正廟後兩館同望故只書一館

月巖

徐橫山作周子月巖記曰自東而入微光西露如月生朏漸入光漸長至門內限光半當上絃循至正中光乃圓以月名巖此漁溪自幼日游處也我東亦有

月巖敦義門外西城底有巖黑夜尚有明光側耳聽之隱隱有波濤聲因以號焉白沙先生委禽於權相之門其家在巖下至今相傳間架不過是十餘間云

可憐碑

關北妓可憐名于世有名是可憐色可憐二句余曾見關北城外尚有其墓題曰關北名妓可憐之墓定平妓銀河月出鈔防役邑村多銀河月防役碑

嚴尚書語燕俗

嚴公璚使燕京還人問其俗公對曰中州亦有四色滿人老論也漢人少論也蒙人午人也人曰北人誰

也公笑曰我國使臣也之東之西觀光而已此說作為名談流入大內

大風樂致語

東國有左右教坊左東京右成都各有大風樂凡一器輒有致語肇倣宋朝王文正時也國有慶會左右坊供之近則不然招募八路而致語則命詞臣撰之戊申進饌嶺南一守宰報牒於都監曰本縣官婢善於汲炊不識歌舞其時傳之以近於諷諫云

鄭鄴泉規模

鄴泉鄭相公素以規模稱其近族將過大碁祭其兄

使其弟告于公其弟恚而不往其兄但促之而已其弟果往告公驚曰吾忘之使汝至矣及給祭需八錢七分也弟攜而來咎於其兄兄復曰更往告易服其弟更以告公曰吾又忘之手接家人數而命掌財者以三十八緡倩人送之其弟大喜過望而回其兄曰然矣設祭與易服皆以此數辦備古人之知心與事無過不及類若此者

裴忠臣

山陵每有鄉民之來守者方表之義也甫廟朝命逐出之英廟朝有賜與之舉自是不得禁之余屢見於

山陵其中有裴姓者居嶺南自唐中浚至己酉國恤時番番來守多受恩賜人誦為裴忠臣與漢之元陵孝子同而異矣

備祭品時規模各異

人家祭時禁兒曹不得近常禮也古者李公泰永祭品備時兒曹或取以食之則不禁曰祖先雖有知必分賜此輩矣徐公箕淳獨子幼時有犯祭物以煙竹毒打因病不淑徐公更不育李公多子孫俱以賢稱而其規模則大異恠哉

月遷

忠州丹越遷以險名於國中李公恭永為嶺伯其夫人方孕到此其轎馬逸人皆驚慮必不能保胎矣及下轎夫人如常人言過境夫人不知其危蓋轎內適睡熟故也後生子即李平泉壽近八十位至正一品此神之保佑而李公經八道方伯有子十三

平生不繫帶

明太祖曰却羨江南富家翁富家翁萬乘之所羨也我國醫譯人有世富平生不繫腰帶裝束曰塞血脈也又不出門曰勞吾形也又我家人曰孫曾之生但告其產不問其長與不長多子孫分掌家產輪回供

饋世人不見其人面目余兒少時得聞於金時中忘其姓名甚恨也


書冊避亂

書帙每以十餘卷付木板於四隅繫緊細結投之水
中年久不濡牛溪先生宅書籍以是免亂於壬丙之
間徃徃見首尾水痕者古蹟也云

涓妓評饌

涓妓每恠巡使供飯不豐之飭後入京見各家飯供
則大不及涓營心笑之及見李忠穆激進飯只設飯
羹而已尤心笑曰富名如此而其飯如此耶少選數

十僮人各奉一器而至公一次下箸更不顧見如是
者無筭方可謂饗饌之不及洪氏具氏家亦有此說
未知孰有是事



十個人各奉一書而全一政下等受不顧見如是
者為策方可謂其能之不及其內具其家亦有此理
未知孰有是事

